

«Eu n'ha cret il prüm chi saja ün sbagl»

Flurina Badel guadogna ün Premi svizzer da litteratura 2020

DA DAVID TRUTTMANN / FMR

Cun seis prüm cudesch da poesias «tinnitus tropic» guadogna l'autura engiadinaisa be direct ün Premi svizzer da litteratura 2020. La FMR ha discurrü culla victura davart e-mails dad uffizis, scritturas verdas, cameriers gentils ed il pledin «infernal».

Pella publicità esa üna novità cha Vus tschüffais ün dals Premis swizzers da litteratura 2020. Ma Vus e l'editura Mevina Puorger savais quai fingià ün temper?

Flurina Badel: Hai, nus savain quai da spö decembre da l'on passà. Eu n'ha tschüf la nouva per e-mail e n'ha cret il prüm chi saja ün sbagl: ün e-mail da l'Uffizi federal da cultura scrit in stil sech e formal. Eu nu vess mai spettà cha meis cudesch pudess guadagnar ün tal premi. Eu n'ha propi pensà il prüm: «Oha, es quai üna malincletta o ün pa exagerà?»

«Oha, es quai üna malincletta?»

Perche?

Id es meis prüm cudesch, ed eu til n'ha scrit cun ün tschert tempo, infra pacs mais. Il cudesch es il resultat d'una prouva intensiva da respuonder ad ün pèr dumondas da basa da mia lingua rumantscha. Il prüm n'haja pensà da far be per mai, quasi sco prelavur per texts chi pudessan lura fors seguir. Ma lura m'hà tschüf quist process culla lingua. Our dad ün prüm impuls haja dat alch bler plü conceptual. Eu n'ha p. ex. lavurà cun glistas da plets, cun reglas ch'eu n'ha stipulà svess, e tuot ina üna jada n'haja gnü sco üna sort saiv intuorn ün prà ed eu am n'ha muantada a bainplachair in quel prà.



Flurina Badel aint il Café Korb a Vienna ingio ch'ella ha lavorà plus mais vi da poesias da «tinnitus tropic».

FOTO J. SCHRANZ

«tinnitus tropic» es Vos prüm cudesch, e fingià gnüs Vus onurada cun ün dals gronds premis litterars in Sviza. Meglder nu poja bod gnanca cumanzar?

Schi, quai dà enorm curaschi. I dà eir curaschi da canticuar in vallader. Ed i dà curaschi da tgnair oura il möd da viwer precar.

Rico Valär ha scrit in üna recensiu da «tinnitus tropic» cha las poesias sajan «plain irritaziuns, piztgadas,

furadas, contrasts». Ed el circumscriva la collezioni da poesias perfìn sco «roadtrip infernal». Perinclet?

Insomma, ün inferno nun esa craja, in mincha cas na be. Plütost «infernal» il sen dad «imprechiunant». Eu lavur cun imprechiuns, aventüras ed algordanzas. E da badair co cha'l temp passa es eir irritond. E lura daja irritaziuns a livel linguistic, perquai ch'eu n'ha lavorà cun blers «i's» agüzs e «c's» abrupts o eir cun plets tecnicos o damain üsítats in rumantsch.

Plain irritaziuns a livel linguistic – esa lura stat ün schaschin a scriver, schabain chi'd ha dürà be ün pér mais.

Eu am n'ha dat – eir quai ün aigna «regla» – fisch pac temp da scriver, dûrant ün sogioun a Vienna. Eu vaiva temp be la bunura tanter las 08.00 e las 10.00. Minchadi da quellas uras suna perquai ida i'l Cafè Korb a scriver. Ils cameriers simpatici savaian adüna fingià che ch'eu baiv, quai m'ha dat il sentimaint da ritual e dad esser prüvada, ma eir l'obligaziun da'm concentrar e scriver. Il cudesch cuntegna a la fin be poesias scritteas dûrant quel temp a Vienna ed inguott'oter. Uschè haja dat ün ensemble.

Vus eschat pel mumaint a Vienna. Voul dir: Flurina Badel fa güsta bellas vacanzas culs raps guadagnats?

Füss eir bel, ma la surdatta dal premi es pür in favrer. Eu lavur a Vienna, fetsch retscherchas per scriver vi dad ün prossem text plü lung, ün text rumantsch, in prosa quista jada, davart üna persuna chi viva per part a Vienna. Ma eu bad cha quista lavur es tuot alch oter co tschella. Lain verer che chi dà. Eu lavurà landervia sgüra amo 5–10 ons.

Tanter Guarda e Vienna

L'autura Flurina Badel (36) es nada a Lavin e viva uossa a Guarda. Davo üna prüma scolaziun da schurnalismus e lavur da comunicaziun ha ella la lavorà tanter oter sco moderatura e cineasta libra. Dal 2015 ha Badel absolt il Master of Fine Arts a Basilea e dal 2017/2018 es ella statta studenta ospitanta a l'Institut per art litterara a Vienna. Actualmaing lavura ella in ün duo artistic cun seis partenari Jérémie Sarbach e chüra tanter oter l'emischiun «Impuls» pro RTR. Sia collezioni da poesias «tinnitus tropic» es cumparüda dal 2019 pro la chasa editura «editionmevinapuorger».

Flurina Badel guadogna ün da nou premis svizzers da litteratura cha l'Uffizi federal da cultura surdà on per on: premis per ün'ouvrà da vita, premis da traducziun o premis per singulas publicaziuns. Il premi grond – il «Grand Prix 2020» – va quist on a Sibylle Berg, l'autura chi'd ha guadagnà l'on passa eir il Premi svizzer dal cedesch 2019 cun si'ouvrà «GRM Brainfuck». Ils premis per singulas ouvras, sco quel per Flurina Badel, sun dotats cun 25 000 francs e vegnan preschiantas in üna turnea da preleccziuns in Sviza. Ils premis vegnan surdats da cuglier federal Alain Berset als 13 da favrer 2020 a Berna.

N'ha giavüschà üna vita intensiva. Uossa tilla n'haja.

Una specialità es cha'l cudesch nun es scrit cun tinta naira, mabain cun verda. Eir quai per amur da l'irritaziun?

Na, per amur da l'estetica. Quella decisiun vaina trat insemel, l'editura Mevina Puorger ed eu. Il cudesch es alb, uschè ch'el guarda oura svelt sco dovrà, sco ün quadern da lavur. Quai muossa la passagerità dad ün'ouvrà. La culur verda ha dachefer eir cul «tropic» dal titel e culla blera natüra chi'd es preschainta illas poesias.

Causa il premi sarà l'agenda – cullas preleccziuns in Sviza – ün pa plü plaina quist on. Uschè chi darà plü pac temp per lavur artistica insemel cul partenari Jérémie Sarbach?

Na, na – nus vain üna buna planaziun. Eu n'ha adüna giavüschà üna vita intensiva. Uossa tilla n'haja. Ed a Guarda ans pudaina retrar e lavurar.

Appel a la responsabludad dal singul

DA LUCAS DEPLAZES / FMR

L'abandun da l'energia nucleara e la sortida da las resuras fossilas èn pus-saivlas fin l'onn 2050. Necessari è ina midada dal cumpartament da mintgin da nus. La decisiu dal cussel federal (2012) da desister da l'energia nucleara pretenda diversas mesiras da regulaziun per garantir vinavant ils basegns da noss pajais. In studi dal Fond nazional – presentatà ier a las medias a Berna – conferma che l'abandun da la forza nucleara fin l'onn 2050 è possaivel e socialmain cumpatibel.

En l'avegnir na duai la Sviza construir naginas ovras nuclearas pli e desister da la producziun d'energia cun ovras nuclearas fin l'onn 2050. La Sviza duai investir dapli en ovras solars cun sustegn da la confederaziun ed augmentar la producziun d'energia regenerabla. Ilos 20 da december 2019 è vegnida messa ord funcziun l'ovra nucleara la pli veglia da Mühleberg, da manaiel da la citad da Berna. Las ulteriuras ovras nuclearas (Beznau e Däniken) pon restar vinavant en funcziun uschè ditg che la segirtad è garantida. Quai ha decidi il pievel. Las ovras nuclearas furneschan var 40% da l'energia che la Sviza consumescha. Cumbain ch'ins ha fatg considerablas investiziuns en l'energia solaria è quella fun-tauna d'energia anc fitg modesta. Sin



Mintgin sto gidar a spargnar energia – uschia in studi dal Fond nazional.

FOTO R. LIEBERHERR

quest sectur d'energia sto la Sviza anc far blier dapli.

Nus pudain, sche nus vulain!

Labandun da l'energia nucleara e da las resuras d'energia fossila è possaivel fin l'onn 2050 or dal puntg da vista tecnic, economic e social. Quai ha confermà Andreas Balthasar da l'Universitat da Lucerna. La gronda part da la populaziun svizra ha acceptà l'abandun da l'energia nucleara. Quella saja dentant da midar noss cumpartament, in agir communabel e diversas mesiras en las singulas chasadas.

Balthasar recomonda er in accord cun l'Uniun europeica davart il current electric. Quest contract duai segirar en l'avegnir da pudair retrair forza electrica en cas da basegn – principalmain durant l'enivern – e da furnir current electric la stad

cura che la Sviza ha energia regenerabla en abundanza.

Nagin receipt segir

En il rom dal Fond naziunal han passa 300 perscrutaders elavurà durant tschingt onns propostas per midadas sin il sectur d'energia e la regulaziun dal consum d'energia. Tut questi studis duain lubir a la Sviza da realisar las finamiras da la strategia «Energia 2050». Ils experts han constatà ch'na dettia betg «la» soluzion, mabain «la» soluzions. La finamira fixada dal cussel federal e confermada dal suveran pretendia in matg da mesiras per far diever pli efficaziamain da l'energia. La politica stoppia far diversas adattaziuns da leschas e reponderar davart ina refurmada taglia ecologica. Mintgin da nus duai esser cunsciente d'under che l'energia vegn ed esser pront da spargnar. Ils experts han formulà 15 recumandaziuns per pudair realisar las finamiras fin l'onn 2050, p.ex: schlängement da l'energia regenerabla, tarifas pli dinamicas e flexibles per il diever, in sistem da finanziazion cun la participaziun dal pievel pertutgà, motivar las vischnancas da nizzeggiar megliur lur pussaivladads d'agir communablama (sistems decentrals d'energia), logistica urbana senza CO₂. Senza dubi saja la transforzaziun da noss sistem d'energia ina gronda sfida, han ils perscrutaders accentuà.

CUIRA

Leibundgut banduna politica

(trr) Tom Leibundgut da la Glista libra verda terminescha suenter 20 onns sia carriera politica. Il politicher da 56 onns ed anterius interprendider da gastronomia na candidescha il matg da quest onn betg pli per ina nova perioda d'uffizi.

Leibundgut è in dals trais commembors da la regenza da la citad e maina da pi set onns il departament da construzion, planisaziun ed ambient. Leibundgut ha communitygà il mardi ch'el saja ussa temp da far plaza per novas forzas e da prender plaza la fin dal 2020 en la se-gunda retscha. Avant che Leibundgut è vegni elegi in il cussel da la citad ha el politisà dal 2003 enfin il 2012 en il cussel communal. Il 2012 ha el er presidìa quel gremi. Il medem onn ha el alura candidà per l'emprima giada per il cussel da la citad nua ch'el è vegni elegi en il segund scrutin.



AGID SVIZZER PER LA MUNTOGNA
TEL. 01/712 60 60 • FAX 01/712 60 50
www.berghilfe.ch • info@berghilfe.ch